



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Suai
31 Marsu 2015

Tribunál Distritál Suai kontinua hakbesik justisa ba comunidade iha área rurais liuhosi tribunál movél

Iha 25-27 Marsu 2015, Tribunál Distritál Suai realiza tribunál movel iha Distritu Ainaro ne'ebé tama ba jurisdisaun Tribunál Distritál Suai nian. Tribunál movel ne'e realiza hodi julga kazu 28 ne'ebé kompostu hosi kazu krime 24 no kazu sivíl 4.

Atraves hosi julgamentu movel ne'e tribunál konklui ona prosesu balun ho klasifikasaun: kazu 5 kondena ho pena prizaun maibé suspende hosi prizaun, kazu 1 kondena ho pena multa, kazu 4 sei kontinua prosesu, kazu 9 tribunál absolve, no kazu 9 seluk tribunál adia tanba arguidu ho lezadu la marka prezensa.

Kazu hirak ne'e involve ofensa ba integridade fíziak simples ho natureza violénsia doméstika 8, ofensa ba integridade fízika simples 3, kazu ameasa 2, krime roubu 1, abuzu konfiansa 1, omisídiu simples 1, furtu agravadu 2, omisídiu negligente 1, pasajem moeda falsa 1, pose arma ilegál 1, abuzu seksauál ba menór 1, danu agravadu no danu simples 1. Enkuantu ba kazu sivíl sira involve "*para conferênsia de país 1, para comprimisso de honra 2 no regulação da poder partenál 1.*"

"JSMP apresia servisu tribunál sira tanba kontinua hakbesik justisa ba comunidade iha área rurais. JSMP hanoin katak antes tribunál regionál ka distriál sira estebelese iha munisípiu ida-idak, julgamentu movel nu'udar opsaun prátiiku ne'ebé responsivu liu iha kontestu ohin loron nian," dehan Diretór Ezekutivu JSMP, Luis de Oliveira Sampaio.

Mekanizmu ne'e efetivu liu tanba bele fasilita comunidade kbi'it la'ek sira-nia asesu ba justisa formal. Maske nune'e JSMP rekomenda atu prosesu hirak ne'e tenke kontinua mantein padraun no prinsípiu julgamentu tuir regra prosesuál aplikavel atu la-bele lakon nia sentidu entre julgamentu iha tribunál distritál sira no julgamentu liuhosi tribunál movel.

JSMP observa katak tribunál, ministériu públiku, defensória públiku, no polísia iha kolaborasaun diak tebes antes no depois julgamentu. JSMP hare katak polísia ajuda tula lezadu no sasin sira mai iha fatin julgamentu no tula fila fali wainhira julgamentu remata. Maioria comunidade hirak ne'e hela iha fatin dok ne'ebé la bele asesu ba transporte publiku iha sira nia hela fatin no julgamentu hirak ne'e balun remata maizumenus iha tuku 07:30 kalan.

JSMP konsidera katak ne'e prátika ida ne'ebé efetivu no efisien tanba hanesan meiu ida hodi servi justisa no garantia justisa ba sira ne'ebé hasoru hela prosesu justisa.

JSMP mós observa katak alende hala'o prosesu julgamentu, atraves hosi tribunál movel ne'e, juís, ministériu públiku no defeza sira aprovetu tempu hodi socializa informasaun legál relasiona ho prosedimentu justisa formal ba comunidade.

Iha julgamentu movel ne'e alende parte interesadu sira, marka prezensa mós hosi entidade relevante sira hanesan polísia no xefe suku balun ne'ebé iha momentu ne'ebá sai sasin.

Julgamentu movel ne'e prezide hosi Juis Administradór Tribunál Distritál Suai, Dr. Alvaro Maria Freitas, Ministériu Públiku representa hosi Dr. Antonio Tavares, Dr. Jose Ello no Defensór Públiku representa hosi Dr. João Henrique de Carvalho no Dr. Manuel Amaral.

Atu hetan informasaun liutan favor kontaktu diretamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Telefone: 3323883 | 77295795

Rua setubal, Colmera, Dili Timor Leste

PoBox: 275

Telefone: 3323883

www.jsmp.tl

Facebook: www.facebook.com/timorleste.jsmp

Twitter: @JSMPtl